



UGOVOR
IZMEĐU
VIJEĆA MINISTARA BOSNE I HERCEGOVINE
I
VLADE REPUBLIKE HRVATSKE
O
ZAJEDNIČKOM FINANSIRANJU ODRŽAVANJA I POGONA REGIONALNOG
ODVODNOG SISTEMA
KOMARNA - NEUM - MLJETSKI KANAL

**UGOVOR IZMEĐU VIJEĆA MINISTARA BOSNE I HERCEGOVINE I VLADE
REPUBLIKE HRVATSKE O ZAJEDNIČKOM FINANSIRANJU ODRŽAVANJA I
POGONA REGIONALNOG ODVODNOG SISTEMA
KOMARNA - NEUM - MLJETSKI KANAL**

Vijeće ministara Bosne i Hercegovine i Vlada Republike Hrvatske (u daljem tekstu: Ugovorne strane)

- u namjeri da uredi međusobna prava, obaveze i odgovornosti za održavanje i pogon Regionalnog odvodnog sistema Komarna - Neum - Mljetski kanal;
- polazeći od odredaba Ugovora o vodorivrednim odnosima između Vlade Republike Hrvatske i Vlade Bosne i Hercegovine, potpisanog 11. jula 1996. godine u Dubrovniku;
- pojedinačnih i zajedničkih interesa Ugovornih strana iskazanih u "Ugovoru o zajedničkoj izgradnji, pogonu, održavanju i finansiranju Regionalnog kanalizacijskog sistema Neum - Mljetski kanal" sklopljenog između Skupštine općine Dubrovnik, Skupštine općine Neum, Samoupravne vodoprivredne interesne zajednice za vodno područje dalmatinskih slivova Split i Samoupravne interesne zajednice vodoprivrede Bosne i Hercegovine Sarajevo, u Neumu 9. aprtila 1986.godine;
- poštujući princip ravnopravnosti i uzajamne koristi,

sporazumjele su se kako slijedi:

Član 1.

Regionalni odvodni sistem Komarna - Neum - Mljetski kanal (u daljem tekstu: Regionalni odvodni sistem) vodna je građevina za zaštitu voda, kojom se osigurava odvođenje otpadnih voda naselja: Komarne, Duboke, Kleka, Neuma i naselja u Malostonskom zaljevu bez štetnih utjecaja na kvalitet voda u Neumskom zaljevu, Malostonskom zaljevu i Mljetskom kanalu.

Regionalni odvodni sistem koji je predmet ovog Ugovora počinje s pumpnom stanicom "Neum" na izlazu iz tunela Orlov kuk, nastavlja se tlačnim i gravitacionim cjevovodom te prijelazom ispod Malostonskog zaljeva i preko poluotoka Pelješac do uvale Prapratno u Mljetskom kanalu. Sastoji se od: glavnog kolektora, pumpne stanice, tunela, podmorskog sifona, mehaničkog uređaja za pročišćavanje otpadnih voda, podmorskog ispusta i drugih pripadajućih objekata ovim građevinama.

Član 2.

Ugovorne strane saglasno utvrđuju da su građenje Regionalnog odvodnog sistema finansirale u skladu sa odredbama člana 7. "Ugovora o zajedničkoj izgradnji, pogonu, održavanju i finansiranju Regionalnog kanalizacijskog sistema Neum - Mljetski kanal", usljed čega je ova vodna građevina u njihovom suvlasništvu.

Ugovorne strane su saglasne da omjer ulaganja finansijskih sredstava svake od njih, u ukupnoj investiciji Regionalnog odvodnog sistema, predstavlja njihov vlasnički udio, tako da vlasnički udio Republike Hrvatske iznosi 30%, a vlasnički udio Bosne i Hercegovine 70% ukupne vrijednosti odvodnog sistema, bliže opisanog u članu 1. stavu 2. ovog Ugovora.

Polazeći od stava 2. ovoga člana Ugovorne strane se, obavezuju da će svaka od njih, u skladu sa svojim unutrašnjim zakonodavstvom, provesti uknjiženje ovog suvlasništva u zemljišnim knjigama, te jedna drugoj dopuštaju ovo provođenje bez ikakvih daljih odobrenja.

Član 3.

Kapacitet Regionalnog odvodnog sistema utvrđen je u Idejnom rješenju "Kanalizacija obalnog područja Malostonskog zaljeva sa dispozicijom u Mljetski kanal" izrađenog od Građevinskog instituta u Zagrebu 1984. godine te se Ugovorne strane obavezuju da će odvodni sistem koristiti do proticajnih količina utvrđenih u tom idejnom rješenju.

U skladu sa prethodnim stavom, područje Komarna, Duboka i Kleka ostvaruju pravo na proticajni kapacitet od 20 l/sec. Radi priključenja ovih naselja na početni objekt Regionalnog odvodnog sistema - pumpnu stanicu Neum, korisnici odvodnog sistema i općina Neum sklopit će poseban ugovor kojim će urediti međusobne odnose u vezi korištenja i održavanja objekata putem kojih se omogućava ovo priključenje.

Član 4.

Građenje, pogon, održavanje i finansiranje komunalne mreže za odvođenje otpadnih voda obuhvaćenih naselja i njihovih priključaka na Regionalni odvodni sistem, nisu obuhvaćeni ovim Ugovorom i svaka Ugovorna strana na svom području rješavat će svoje potrebe o svom trošku i samostalno, a u skladu s tehničkim rješenjem Regionalnog odvodnog sistema.

Član 5.

Ugovorne strane se obavezuju da će svaka na svom području osigurati zaštitu Regionalnog odvodnog sistema od neovlaštenog korištenja, radnji i upravljanja koja su suprotna odredbama ovog Ugovora.

Ugovorna strana koja postupi suprotno odredbi prethodnog stava, uslijed čega druga Ugovorna strana pretrpi štete dužna je tu štetu nadoknaditi.

O odštetnom zahtjevu i visini štete odlučuje Komisija za vodoprivredu Republike Hrvatske i Bosne i Hercegovine.

Član 6.

Ugovorne strane će kontinuirano osiguravati finansijska sredstva potrebna za redovno održavanje i pogon Regionalnog odvodnog sistema i to svaka u omjeru svog

suvlasničkog dijela.

U ime Ugovornih strana za osiguranje sredstava iz prethodnog stava nosioci će biti Hrvatske vode Zagreb za područje Republike Hrvatske i Javno preduzeće za "Vodno područje slivova Jadranskog mora" za područje Federacije Bosne i Hercegovine (u daljnjem tekstu: Osiguravaoci sredstava).

Osiguravaoci sredstava će osigurati potrebna sredstva putem općina i kantona i to svako na svom području.

Visina potrebnih sredstava utvrdit će se za svaku kalendarsku godinu i to do 30. novembra tekuće godine za sljedeću godinu.

Odluku o visini potrebnih sredstava donosi Komitet za vodoprivredu Republike Hrvatske i Bosne i Hercegovine na prijedlog Komisije iz člana 10. ovog Ugovora. Ova odluka mora sadržavati troškove održavanja, pogona i upravljanja, podjelu troškova, te načm plaćanja troškova održavanja, pogona i upravljanja Regionalnim odvodnim sistemom.

Član 7.

Ugovorne strane su sporazumne da se Regionalni odvodni sistem, koji je predmet ovog Ugovora, povjeri na pogon i održavanje Javnom preduzeću "Mareco" iz Neuma (u daljnjem tekstu: JP "Mareco").

Međusobna prava i obaveze Ugovornih strana i JP "Mareco" uredit će se posebnim ugovorom koji će u ime Ugovornih strana s JP "Mareco" sklopiti Osiguravaoci sredstava.

Član 8.

U skladu sa odredbom člana 6. Ugovora između Vlade Republike Hrvatske i Bosne i Hercegovine o uređenju vodoprivrednih odnosa, građevinski materijal, ostala potrošna sredstva, strojevi i ostala sredstva rada koja su potrebna za održavanje i pogon Regionalnog odvodnog sistema, a koja se prenose s područja jedne Ugovorne strane na područje druge Ugovorne strane, oslobođeni su svih uvoznih i izvoznih taksi.

Građevinski materijal, ostala potrošna sredstva, mašine i ostala sredstva rada iz stava 1. ovog člana mogu se uvoziti uz uslov da se prijave carinskim tijelima zbog identifikacije, te da se građevinski materijal i potrošna sredstva, koja se neće ugraditi, vrate u roku kojeg odrede carinska tijela. Pri tome nije potrebno položiti garancije za propisane takse. Za ona sredstva koja se do određenog roka ne vrate potrebno je obračunati i naplatiti takse. Sredstva koja su zbog potpunog iskorištenja i dotrajalosti neupotrebljiva, te se zato ne vraćaju oslobađaju se carine.

Član 9.

Zaposlenicima JP "Mareco", a radi provođenja ovog Ugovora izdat će se dozvole za

prijelaz državne granice na graničnim prijelazima i izvan njih.

U dozvoli se određuje područje na kojem se imalac dozvole smije kretati i vrijeme kada se smije kretati u tom području.

Ugovorne strane su dužne, u skladu sa svojim unutrašnjim zakonodavstvom koje uređuje prelazak državne granice, osigurati pravovremeno izdavanje dozvola iz stava 1. ovoga člana.

Član 10.

U cilju praćenja i izvršavanja ovog Ugovora i rješavanja ostalih bitnih pitanja od značaja za pogon i održavanje vodnih građevina kao i radi zaštite interesa Ugovornih strana, Ugovorne strane su saglasne, putem Osiguravaoca sredstava osnovati Podkomisiju za Regionalni odvodni sistem (u daljnjem tekstu: Podkomisija).

U Podkomisiji Osiguravalac sredstava imenuje po jednog člana.

U Podkomisiji se imenuju i po jedan član svakog kantona (Dubrovačko-neretvanski iz Republike Hrvatske i Hercegovačko-neretvanski iz Federacije Bosne i Hercegovine).

Ovlašteni predstavnik JP "Mareco" je član Podkomisije.

Podkomisija radi po Poslovniku koji sama donosi.

Podkomisija će se osnovati u roku od 10 dana od dana sklapanja ovog Ugovora.

U okviru svojih nadležnosti Podkomisija će davati potrebne saglasnosti, mišljenja i obavljati usmjeravanja cjelokupnih aktivnosti, a naročito za:

- investiciono-tehničke dokumentacije i poslove vezane za održavanje i rekonstrukciju sistema;
- izbor izvođača radova;
- pripremu dinamičkog plana realizacije usvojenog Programa održavanja i rekonstrukcije;
- informiranje nadležnih tijela Ugovornih strana (Osiguravaoca sredstava);
- usuglašavanje spornih i drugih pitanja od značaja za izgrađeni objekt i sistem kao cjelinu;
- predlaganje obračunskih elemenata za utvrđivanje troškova održavanja i rekonstrukcije;
- izvještavanje Osiguravaoca o preduzetim aktivnostima.

Podkomisija će obavljati i sve ostale poslove od značaja za pogon i održavanje objekata koji su predmet ovog Ugovora.

Član 11.

Ovaj Ugovor se može mijenjati i dopunjavati samo uz pisani sporazum Ugovornih strana.

Član 12.

Stupanjem na snagu ovog Ugovora prestaju važiti odredbe "Ugovora o zajedničkoj izgradnji, pogonu, održavanju i finansiranju Regionalnog kanalizacijskog sistema Neum - Mljetski kanal" (od 9. aprila 1986.godine).

Član 13.

U slučaju da dođe do spora u tumačenju ili primjeni ovog Ugovora, a na nivou imenovane Komisije za vodoprivredu Republike Hrvatske i Bosne i Hercegovine ne postigne se sporazum o načinu njegova rješavanja, nadležna tijela Ugovornih strana predložiti će rješavanje spora arbitražnom sudu kao što je određeno u dijelu III Član 22. Konvencije o zaštiti i upotrebi prekograničnih vodotoka i međunarodnih jezera (Helsinška konvencija).

Član 14.

Ovaj Ugovor stupa na snagu danom prijema zadnje obavijesti diplomatskim putem kojom se strane međusobno obavještavaju da su ispunjeni uslovi predviđeni unutrašnjim zakonodavstvom za njegovo stupanje na snagu, a privremeno se primjenjuje od dana potpisivanja.

Član 15.

Ovaj Ugovor sklapa se na neodređeno vrijeme.

Svaka od Ugovornih strana može u bilo koje vrijeme otkazati ovaj Ugovor s time da o otkazu obavijesti diplomatskim putem drugu Ugovornu stranu. U tom slučaju Ugovor prestaje važiti godinu dana nakon što Ugovorna strana primi obavijest o otkazivanju Ugovora.

Sastavljeno u _____ dana _____ u dva (2) originala, svaki od njih na hrvatskom jeziku, bosanskom jeziku i srpskom jeziku za Bosnu i Hercegovinu i hrvatskom jeziku za Republiku Hrvatsku, pri čemu su svi tekstovi jednako vjerodostojni.

ZA VIJEĆE MINISTARA
BOSNE I HERCEGOVINE

ZA VLADU
REPUBLIKE HRVATSKE